

# INUIT ATAQATIGIIT

## Inatsisartuni



UKA 2020/30  
18. november 2020  
Múte Bourup Egede

**Nunatsinni, Namminersorlutik Oqartussat pilersitaannik, Namminersorlutik Oqartussat oqartussaaffigisaannik aningaasaqarnermik ingerlatsivinnik, soorlu aalisarnermut aningaaseriviliornissamik, kreditforeningiliornissamik, pensionskarsiliornissamik aammalu sillimmasiisarviliornissamik pitsaaqutaasussat akimmisaarutaasussallu pillugit Naalakkersuisut nalunaarusioqqullugit peqquneqarnissaannik Inatsisartut aalajangiiffigisassaattut siunnersuut. Aallartitsinermi aningaasarsiornerup silarsuaani naatsersuutigineqartut, ass. pisortanit aallarnisarnermi aningaasaliissutaasussat aammalu sulisoqarnikkut pisariaqartinneqartussat nalunaarusiami pingaartillugit ilaatinneqassapput.**

(Inatsisartunut ilaasortaq Henrik Fleischer, Siumut)

Inuit Ataqatigiit isumaqarput inuiaqatigiit aningaasaatitta nunap iluani kaavitittuarnissaat erniortissinnaajuarnissaallu inatsisiliortutut qulakkeerniagassarigipput.

Inuiattullu nammineq kivissinnaasavut nunatsinnilu pissutsinut naapertuussakkamik ingerlatsisinnaanerput annertusartuartaqaripput.

Siunnersuuteqartoq Inatsisartunut ilaasortaq Henrik Fleischer oqaatsigeqqammisannut naapertuuttumik siunnersuuteqarpoq. Anguniakkamut taamaattumut qanillattorumalluni misissuinikkut qulaajaasoqarnissaa anguniarlugu.

Siunnersuut qaqinneqartoq, siunnersuuteqartup nammineq aamma saqqummiinerani erserpoq aatsaat qaqinneqalinnigisoq. Siusinnerusukkut qaqinneqartarnerani Inatsisartuni siammasissumik taparserneqartareerpoq misissuinissaq, Inuit Ataqatigiinniillu neriuutigaarput kiisami maanna misissuineq Naalakkersuisunit kipineqaannarani naammassineqassasoq.

Nunarput ukiuni arlaqalartuni aningaaserivimmik piginneqataareerpoq, tassa Grønlandsbankenimi ingerlatseqatigiiffiutitta ilaat aqqutigalugu aktianik piginneqataagami, taassumalu saniatigut Nuna Fonden aamma piginneqataassuteqarluni. Taamaalilluta tamakkiisuunngikkaluarmik nunarput ullumikkorpiaq aningaaserivimmik nunatsinniittumik piginneqataavoq.

Aningaaserivimmik piginneqataareeraluarluta tunngaviatigut siunnersuutip siunertaanut misissuinissamullu isumaqataavugut. Nunattami namminerisamik pigisaanik aningaaserivimmik aningaasaqarnermilluunniit ingerlatsivimmik pilersitsiniassagaluarutta, iluaqutissartaasa aammalu aporfissartaasa suunerinik qulaajaanissamut periarfissaq iluatinnartikkatsigu.

Ukiummi makku atorpavut siunissami namminersulivissinnaanermut suliniarluta, taamaattumik aningaasat kaaviiartitatta siunissami sapinngisaq tamaat atorlugu nunap iluani kaaviarsinnaajuarnissaannik aqqutissiorniartariaqarpugut.

# INUIT ATAQATIGIIT

## Inatsisartuni



Qulaajagassat ikitsuinnaanaviangitsut nalunangereerpoq. Ilaatigut aningaasaqarnermi sunniutigiumaagai, inatsisiliornikkut suliassat, pingaartumik aningaasarsiornermi ingerlatsineq naalagaaffiup ataani inissisimammat, assersuutitut sillimmasiisarnermut aningaaseriveqarnermullu tunngasut danskit aningaasatigut nakkutilliveqarfimmit, Finanstilsynemit nakkutigisaapput immikkullu inatsiseqarlutik.

Siunnersuut aappassanneernejartinnagu Aningaasaqarnermut Akileraartarnermullu ataatsimiititaliamut suliassanngortillugu ingerlateqqipparput.